

## Fas Tesalonaeka Nægkiariien sə rani mə nəfe i nəkukuə

Pol ramavən maməvisau irapw nəgkiariien amasan səvəi Kristo ia kwopun me. Ia navəniən səvənhi sə ro kəru irə rərpwi vi a nousəsəmwiniən səvəi nakalasia me fwe Tesalonaeka. In rarə fwe ikən nəfwakiien kahar nənə mier ti nəri nə mə nəkur Isrel həmwəki in, mhometə in. Ia nuk 51 Timoti rərhi pen nəkukuə riti revən ti Pol maməgkiari ia narəien səvəi nakalasia me fwe Tesalonaeka. Pol ramarə fwe Korin nəpən in ruvehi nəkukuə səvəi Timoti. In rokeikei mə truvehi utə nətəriɡiən səvəi nəkur Tesalonaeka ro pen rirai nəkukuə i. Pol rinaməgnəɡini nəkur Tesalonaeka ti nəri nə mə hamərər əknekən ia nahatətəien səvənraha nəpən nərmama hamometə irəha. In ramahatən irəha ia narəien sə ratukwatukw ia nəmri Kumwesən, mamahatən mwi irəha ia nuveheien səvəi Iesu. Kitaha səreirei mə Iesu truvehe ia nəfe nəpən. Ro pen tsaməmwur ia noien amasan meste nuveheien səvəi Iesu Kristo.

<sup>1</sup> Iou Pol, Saelas, mine Timoti.

Nəkukuə i rauvehe tukumiaha nakalasia me fwe Tesalonaeka. Kimiaha nərmama səvəi Kumwesən tata səkitaha mine Iesu Kristo Iərimənu səkitaha.

Pwəh namasanien mine nəməriniən krauarə tukumiaha.

*Kini vivi Kumwesən ti nahatətəien səvəi nəkur  
Tesalonaeka*

<sup>2</sup> Nəp̄in me pam iahaməni kimiaha ia nəfwakiiien me səkimaha, nənə mamhəni vivi Kumwesən tukumiaha pam,

<sup>3</sup> ti nəri nə mə ia nəmri Kumwesən Tata səkitaha rerimaha ramrhi noien amasan səkimiaha sə ruku pen ia nahatətəien, mine nəmwurien səkimiaha sə ruku pen ia nokeikeiiien, mine nərerien səkimiaha sə hiamərer əknek̄in irə ti nəri nə mə hiamri pen əknek̄in nətərigien səkimiaha ia Iərimənu səkitaha Iesu Kristo.

<sup>4</sup> Piak me, Kumwesən rokeikei kimiaha, nənə muvər̄fi raka kimiaha mə kimiaha nərmama me səvənhi. Kimaha iahəukurən amasan mə nəri nəha ro n̄ipər̄hienien

<sup>5</sup> ti nəri nə mə nəp̄in nəgkiariien amasan sə iahaməvisau irapw i riməuvehe tukumiaha fwe kupwən, r̄ipkuvehe mhə ia nəgkiariien a, mətə ruvehe mw̄i ia nəgsen, mine Nənimw̄in Ikinan, mine ia suatuk riti sə rahatən pen mə hiamahatətə pər̄hien irə. Nənə nəp̄in iahənarə kitaha m kimiaha, hiəukurən mə iahənəfarə irə. Iahəno a narimnari me rasitu ia kimiaha.

<sup>6</sup> Nənə ia nəp̄in nəha hiəuvehe mhəmwhen a ia kimaha mine Iərimənu səkitaha, ti nəri nə mə nəp̄in kuvei pehe nəgkiariien səvəi Kumwesən m kimiaha nənə hiəuvehi nərmama ho nəmisəien asori m kimiaha, mətə Nənimw̄in Ikinan ro rerimiaha ragien a.

<sup>7</sup> Ia noien nəha hiənahatən suatuk amasan riti m nərmama me pam səməme kamhahatətə fwe

---

**1:2:** Fil 1:3-4, Kol 1:3, 2Tes 1:11    **1:3:** 1Kor 13:13, Kol 1:4-6    **1:5:**  
1Kor 2:4-5, 1Kor 4:20    **1:6:** 1Kor 4:16, 2Tes 3:9, Wok Me 17:5-9  
**1:7:** 1Tes 5:3

profens mi nəha Masetonia mine Akaea mə tuhəsi pen noien səkimiaha.

<sup>8</sup> Iakani iamınhi irə ti nəri nə mə kimiaha hiənəvisau irapw raka nəgkiariien səvəi lərimənu kuvəregi ia kwopun me rəmwhen ia kisipw rasək. Ripko mhə fwe Masetonia əpa mine Akaea, mətə nərmama ia kwopun me pam həuvəregi raka kamini mə hiənəfo mhəuvehe mhahatətə ia Kumwesən. Ro iamınhi irə kimaha tahəni nəgkiariien riti ti nəfe.

<sup>9</sup> Nərmama me pam nəha kamhəgkiari ia kitaha, mamhəni mə nəpın iahəuvehe mhətə kimiaha fwe kupwən, hiəsevər ia rerimiahaha tukumaha, nənə mharaka ia nənimwi nari me səkimiaha səməme hiaməfwaki pen mınraha, mhəuvehe mhəkurirə Kumwesən səkimaha. Irəha kamhəni mə ipwet mine hiamo tukwini nari m Kumwesən pərhiən sə ramiru,

<sup>10</sup> mamheitenhi tını sə in rino rətui mwi ia nemhəien. Tini nəha Iesu sə truku pen ia neiai, muvehe, muvehi raka kitaha ti niemaha səvəi Kumwesən ia nəpın rauvehe.

## 2

### *Wok sə Pol rino fwe Tesalonaeka*

<sup>1</sup> Piak me, kimiaha hiəukurən mə nəpın iahəuvehe mhətoni kimiaha fwe kupwən, nuveheien səkimaha ripko mhə nəri auər a irə.

<sup>2</sup> Hiəukurən mə nəpın iahamarə ihi fwe Filipae, nərmama ho nəmisəien m kimaha, mhəni ərəha kimaha. Mətə Kumwesən səkitaha rino

---

**1:8:** Rom 1:8      **1:9:** Wok Me 14:15      **1:10:** Taet 2:13, Wok Me 17:31, 1Tes 5:9      **2:1:** 1Tes 1:5,9      **2:2:** Wok Me 16:19-24, Wok Me 17:1-9

nətərigien səkimaha riskai iahəuvehe mhəni irapw nəgkiariien amasan səvənhi tukumiaha ia nəmri nərmama həpik səməme həmwəki nəgkiariien nəha.

<sup>3</sup> Nənə hiəukurən mə nəgkiariien səkimaha iahənəvisau irapw m kimiaha rier ia tərhumaha ti nəfe? Ti nəri nə mə iahərkwafə nətərigien ərəha riti ia rerimaha, uə iahəmwur mə taheikuə ia kimiaha, uə taho nifeifeiien m kimiaha? Rekəm!

<sup>4</sup> Iahəpwəh noien iamınhi irə, mətə ia nəpın me iahaməni nəgkiariien sə Kumwesən rokeikei, ti nəri nə mə in rinətə raka kimaha mə iahəmwhen, rəmri pehe nəgkiariien amasan səvənhi ia tipage rəgimaha. Ro iamınhi irə iahəpkəmwur mhə mə nərmama rerınraha tragien tukumaha, mətə iahəmwmur mə Kumwesən sə ramətə nətərigien səkimaha rerın tragien tukumaha.

<sup>5</sup> Rəmwhen kimiaha hiəuvəukurən raka kimaha iahəpkuvehe mhə mhəni nəgkiariien əsien me tukumiaha, uə nəgkiariien sə tahəvi kimiaha irə hiəuvehe mhəuvei pehe mane m kimaha. Kumwesən mwi rukurən mə nəgkiariien i ro nıpərhienien!

<sup>6</sup> Nənə iahəpkəmwur mhə mə taho nərmama həgnəgini kimaha. Iahəpwəh noien iamınhi irə ia kimiaha uə ia nərmama nepwın mwi.

<sup>7</sup> Nənə nari riti ti nəri nə mə kimaha aposol me səvəi Kristo iahəukurən niniien mə tihaməkeikei mhəsiai kimaha rəmwhen ia nəmə asori me, mətə iahəpkə mhə iamınhi irə. Nəpın iahamarə kitaha m kimiaha fwe kupwən, noien səkimaha riməru

---

**2:4:** 1Tim 1:11, Kal 1:10, Jer 11:20    **2:5:** Wok Me 20:33, 2Tes 2:3, Rom 1:9, 1Tes 2:10    **2:6:** Jon 5:41,44

rəmwhen ia mama riti sə ramətui amasan ti nīpwnətīn me.

<sup>8</sup> Iahokeikei pik kīmiaha, ro pen ia nəpīn me nəha rerīmaha ragien ti nīni irapwien nəgkiariien amasan səvəi Kumwesən tukumiaha. Mətə rīpko mhə in əpa i, rerīmaha ragien a mwi ti nuvei peheien nīmīruien səkīmiaha m kīmiaha ti nəri nə mə iahokeikei pik kīmiaha.

<sup>9</sup> Piak me, rerīmīaha ramrhi wok skai sə iahəno uə rekəm? Nəpīn iahaməni irapw nəgkiariien amasan səvəi Kumwesən tukumiaha, iahamo wok ia rəgīmaha ia nəpīn mīne ia ran mə tahəpwəh nəres peheien nari riti tukumiaha.

<sup>10</sup> Kīmiaha mīne Kumwesən mwi hiəukurən mə nəgkiariien i ro nīpərhienien! Nəpīn ia-hamarə kitaha m kīmiaha nərmama hiamahatətə ia Kumwesən, noien səkīmaha ro ikinan, matuk-watukw, məmher.

<sup>11</sup> Hiəukurən mə iahəno m kīmiaha rəmwhen ia tata riti ramo m nīpwnətīn me.

<sup>12</sup> Iahamərpwi əknekīn kīmiaha, mamhəuvehi utə nətərigien səkīmiaha, nənə mamhəgkiari skai m kīmiaha mə tiharə ia narəien sə ratukwatukw ia nəmri Kumwesən. In raməkwein kīmiaha mə tihəuvehe ia nəkwai nītətə sə in ramərimənu irə mamhəhiapw.

<sup>13</sup> Nari riti mwi nəha ikīn ia nəpīn me pam iahaməni vivi Kumwesən tukwe. Nəpīn iahəni pehe nəgkiariien səvəi Kumwesən tukumiaha, kīmiaha hiəregi, mhəuvehi nəgkiariien nəha, mhəni nīpərhienien irə. Hiəpkuvehi mhə nəgkiariien nəha rəmwhen ia nəgkiariien səvəi

iarmama, mətə hiəuvehi atukwatukw mhəukurən mə nəgkiariien i in pərhiēn nəgkiariien səvəi Kumwesən. Nəgkiariien nəha rauverə ia kimiaha səməme hiaməni nīpərhiēnien irə.

14 Piak me, hiəukurən nakalasia me səvəi Kumwesən fwe tənə Jutia kamhəni nīpərhiēnien ia Iesu Kristo. Kimiaha hiəuvəuvehe mhənəmwhen raka ia nīrəha. Iakani iamīnhi irə ti nəri nə mə nəmīsəien me nəha nəkur Isrel hənō mīnraha nəkur imwəmiaha me hənō rəmwhen a mwi ia kimiaha.

15 Nəkur Isrel me nəha irəha hənousi əpune Iesu Iərimənu səkītaha, mīne profet kupwən me, nənə mhəkoui irapw kimaha iahəier. Kumwesən rerin rīpkagien anan mhə ti nīrəha. Irəha kamhəmwəki nərmama me pam,

16 mamhəmwur mə tuhənise kimaha iahəpwəh nəgkiariien m nərmama rīpko mhə irəha nəkur Isrel kamo Kumwesən ruvehimīru irəha. Ia noien nəha kamhakutan pen noien ərəha səvənraha meste trukuar. Mətə təkwtəkwuni nəha niemaha səvəi Kumwesən ruvəuvehe mīneste irəha.

### *Pol rokeikei pīk mə trətōni mwi nəkur Tesalonaeka*

17 Piak me, fwe kupwən kimaha iahənəpwəh kimiaha ia nīpwramaha mhəuvən isipwīn tukumiaha səvəi nəpīn ouihī, mətə nətərigien səkīmaha raməmak ihī ia kimiaha. Ia nəpīn nəha iahaməmwur pīk mə tahərərig mhətōni mwi kimiaha ti nəri nə mə iahokeikei pīk kimiaha.

18 Iahənokeikei mə tahəuvehe mhətoni kımiaha, iou, Pol, iakani pərhiən mə iakinəmwur nəpın rıpık, mətə Setan rəsisəg kımaha.

19 Nəfe nəha iahaməmri pen əknekın nətərigiən səkimaha irə, uə nəfe nəha nəgiənien səkimaha mine kəfəfau səvəi nisaiien sə tahərpwi kımaha tukwe ia nəmri Iərimənu səkitaha Iesu nəpın in truvehe irə? Rosi kımiaha nə uə?

20 Ouəh nıpərhiənien, kımiaha nə nərmama iahamərpwi kımaha tukumiaha, nənə rerimaha ramagiən tukumiaha.

### 3

1 Nəpın kımaha iahəuvavən isipwın tukumiaha, rerimaha rəpou pık ti nəri nə mə iahəreirei mə hiamarə amasan uə rekəm. Ro iamınhi irə iahəni simwın mə iou mine Saelas trauarə kımrau əpa ia taon nəha Atens,

2 mətə Timoti truvehe mətoni kımiaha. In piəvtaha riti sə ramo wok səvəi Kumwesən kımaha min, iahaməvisau irapw nəgkiariien amasan səvəi Kristo. Kımaha iahərhi pehe in tukumiaha mə trasiu ia kımiaha muvehi utə nətərigiən səkimiaha, nənə mərpwi əknekın kımiaha ia nahatətəien səkimiaha,

3 mə nəmisəien me i kamo m kımiaha tuhəpwəh noien kımiaha riti rımwei. Hiəuvəukurən raka mə nəri in i kımərfi raka mə tuko m kitaha iamınhi irə.

4 Nəpın iahamarə kitaha m kımiaha fwe kupwən iahaməni pehe tukumiaha mə tuko nəmisəien m kitaha. Nənə hiəukurən amasan mə ruvəuvehe

mīno nīpārhiēnien irə rəmwhēn iahəmāni tukumi-aha i.

<sup>5</sup> Ro iamīnhi irə nāpīn rerīk rəpou pik ti nəri nə mə iakreirei mə hiamarə amasan uə rekəm nənə iakərhi pehe Timoti mə truvehe mətōni ro nahatətāien səkīmīaha mə ramskai ihi uə rekəm. Iakamhekīr mə ia suatuk riti Setan sə raməmwur mə tro nərmama hēmwei ia nərəhaien rīno raka kīmīaha hēmwei ia nərəhaien, nənə wok səkīmaha tro nəri auər a irə.

*Timoti rīrərīg pehe məvisau nəgkiariien amasan riti m Pol mīne Saelas*

<sup>6</sup> Təkwtəkwwuni nəha Timoti ruvərərīg pehe mwi tukumaha, nənə məvisau pehe m kīmaha nəgkiariien amasan i raməgkiari ia nahatətāien mīne nokeikeiien səkīmīaha. In rīmāni pehe tukumaha i mə rerīmīaha ramrhi ihi kīmaha ia nəgīenien, nənə mhokeikei mə tihətōni kīmaha rəmwhēn a ia kīmaha iahokeikei mə tahətōni kīmīaha.

<sup>7</sup> Ro iamīnhi irə, piak me, nəri auər a iahamregi rərəha ia nəmīsāien me i kamo m kīmaha, mətə nəgkiariien sāvai nahatətāien səkīmīaha rīməuvehi utə nətərīgīen səkīmaha tukumīaha.

<sup>8</sup> Nāpīn kīmaha iahəregi mə kīmīaha hiamərər əknekīn ti Iərīmānu səkītaha iahəregi mə iahəuvehi mwi nīmīruien.

<sup>9</sup> Ia nəmri Kumwesən səkītaha rerīmaha ramagīen tukumīaha. Nəgīenien nəha rasori pik mamō kīmaha iahamāni vivi Kumwesən tukumīaha.



<sup>10</sup> Ia nəpɪn me pam ia nəpɪn mɪne ia ran ia-haməfwaki skai mə tahətoni mwi kɪmiaha, mha-hatən kɪmiaha ia nəfe hiəreirei ihi mə nahatətəien səkɪmiaha trɪskai mwi.

<sup>11</sup> Nənə pwəh Kumwesən tata səkɪtaha, mɪne Iesu Iərimənu səkɪtaha, trouo suatuk riti səkɪmaha ti nuveheien mhətoni kɪmiaha.

<sup>12</sup> Pwəh Iərimənu səkɪtaha tro nokeikeien i hiamo m kɪmiaha me mɪne nərmama me pam ruvehe masori mwi rəmwhen ia nokeikeien səkɪmaha rasori tukumiaha.

<sup>13</sup> Ia noien i in tro rerɪmiaha rɪskai. Nənə ia nəpɪn nəha Iesu Iərimənu səkɪtaha truvehe irə irəha nərmama ikinan me səvənhi, tihərer ia nəmri Kumwesən tata səkɪtaha, mhatukwatukw, mhəmher.

## 4

*Nəfe nəha noien nəkur əfwaki me tuho Kumwesən rerɪn ragien ti nɪrəha*

<sup>1</sup> Piak me, takaməkeikei məgkiari ia narimnari nepwɪn. Iahənahatən raka kɪmiaha ia nəfe noien sə tiho mə Kumwesən rerɪn ragien tukumiaha. Nɪpərhienien i hiəno raka. Nənə təkwtəkwuni iahaməres kɪmiaha nənə mamhəres skai ia nəghi Iesu Iərimənu səkɪtaha mə tihamo a iamɪnhi irə mamhəuvən.

<sup>2</sup> Hiəuvəukurən raka nəvəhagien me nəha səməme iahəuvei pehe m kɪmiaha fwe kupwən ia nəghi Iesu Iərimənu səkɪtaha.

<sup>3</sup> Nəri in i nəkwai Kumwesən mə kɪmiaha tihəmher, mho nəkur ikinan me səvənhi ia

kimiaha. Tihəpwəh nesi penien suatuk səvəi nīpran mīne nərman səməme kamhəiri əpnapen irəha me.

<sup>4</sup> Kurirə kīmiaha kuatia kuatia hiəiri pran tihəkupwən mhəukurən noien sə rəmher, mo ikinan, mo nisaiien kamiri pran irə.

<sup>5</sup> Tihəpwəh niriien pran ia suatuk sə hiaməkurirə a nəfe nīpwramiaha rokeikei pik rəmwhen ia nərmama səməme həreirei Kumwesən kamho.

<sup>6</sup> Ia narimnari me nəha, kīmiaha riti trəpwəh noien rərəha ia piəvni makres səvənhi pran uə tini. Iərimənu səkitaha trərpwīn noien ərəha səvəi nərmama me nəha səməme kamho noien nəha rəmwhen iahəuvəni skai raka tukumiaha.

<sup>7</sup> Kumwesən rīpkəkwein mhə kitaha mə tsamesi pen noien sə rəmkekik, mətə noien sə rəmher, mo ikinan i.

<sup>8</sup> Ro pen iərmama sə ruvei pen təkutan m nəvəhagien i, rīpko mhə ruvei pen təkutan m iərmama, mətə ruvei pen təkutan m Kumwesən sə rauvei pehe Nənīmwiin Ikinan səvənhi m kīmiaha.

<sup>9</sup> Mətə ia nīkaren səvəi nokeikeiien sə hiamo m piəvtaha me kīmaha tahərai nəkukuə tukumiaha ti nəfe. Kumwesən rīnahatən raka kīmiaha mə tihaməkeikei mhəkeikei kīmiaha me.

<sup>10</sup> Nənə pərhiēn hiokeikei piəvtaha me pam fwe Masetonia. Mətə piak me iahaməres pehe mə tihamo a iamīnhi irə mamhəuvən.

<sup>11</sup> Tihaməkeikei mamhəmwur mamharə ia narəien afafa, mamhətui atukw a ti narimnari

---

**4:6:** Sam 94:1    **4:7:** 2Tes 2:13-14, 1Pit 1:15-16    **4:8:** Luk 10:16, Esik 36:27, Esik 37:14, 2Kor 1:22    **4:9:** Jon 13:34    **4:10:** 2Tes 3:4  
**4:11:** Efes 4:28, 2Tes 3:8,12

me sækimiaha, nənə mamho wok ia rəgimiahā rəmwhen a iahəuvəni raka tukumiahā i.

<sup>12</sup> Ia noien nəha nərmama iruə me tuhətoni noien sə hiāmo ia nəp̄in me mə ratukwatukw a. Nənə tihəpwəh nətigiteien ia nərməpə me mə tuhəuvei pehe nəfe riwən təni kīmiaha.

*Nuveheien səvəi Iərimənu səkītaha*

<sup>13</sup> Piak me, kīmahā iahokeikei mə tihāməkeikei mhəukurən kaməfo ia nərmama me i səməme həuvamhə mə tihəpwəh nasəkien ti nīrəhā rəmwhen ia nərmama səməme nari amasan riti riwən kamheitenhi mə truvehē.

<sup>14</sup> Kītaha saməni nīpərhienien mə Iesu rīmamhə marə mətui mwi ia nemhəien səvənhi. Ro pen səukurən mə tuko mwi iam̄inhi irə ia nərmama me i səməme hāməni nīpərhienien ia Iesu meste hemhə. Kumwesən tripeki irəhā hərərig mwi irəhā Iesu.

<sup>15</sup> Nəgkiariien i iahaməni pehe tukumiahā i təkwtəkwuni in nəgkiariien səvəi Iərimənu səkītaha. Kītaha i nərmama səməme saməm̄iru ihi meste nuveheien səvəi Iərimənu səkītaha, kītaha ko səpkukupwən mhə ia nərmama səməme həuvamhə raka.

<sup>16</sup> Iərimənu səkītaha truku pen fwe ia neiai mameiwaiu pehe. Ia nəp̄in nəha in tr̄ini nəkwān, agelo sə in rasori ia nagelo me trəkwein, kisipw səvəi Kumwesən trasək, nənə nərmama səməme hāməni nīpərhienien ia Kristo meste hemhə irəhā tuhəkupwən mhətui mwi ia nemhəien səvənraha.

<sup>17</sup> Kurirə irə kītaha i səməme saməm̄iru ihi tuku-vehi kītaha səutə kītaha m̄inraha. Tsəutə i nəpuə

---

**4:12:** 1Kor 5:12-13, Kol 4:5    **4:13:** Efes 2:12    **4:14:** Rom 14:9, 1Kor 15:3-4,12    **4:15:** 1Kor 15:51    **4:16:** 1Tes 1:10, 2Tes 1:7, 1Kor 15:52

me tsətoni Iərimənu səkitaha ia nimagouagou. Nənə tsarə rerin kitaha Iərimənu səkitaha.

<sup>18</sup> Ro pen tihəni nəgkariien me i tukumiaha me mhəuvehi utə nətərigien səkimiaha me irə.

## 5

<sup>1</sup> Mətə piak me, ia nikaren səvəi nəp̄in atukwatukw narimnari me nəha tuhəier pehe irə kimaha tahərai nəkukuə tukumiaha ti nəfe.

<sup>2</sup> Kimiaha hiəuvəukurən raka mə nəp̄in i kani mə Nəp̄in səvəi Iərimənu truvehe rəmwhen ia rakres sə rauvehe ia nəp̄in.

<sup>3</sup> Nəp̄in nərmama kamhəni mə, “Narimnari me pam həmərinu, nari riti tro nehekiriien i riwən,” nənə, nərəhəien truvehe akwauakw ti nirəha rəmwhen ia pran sə təkutan rinaməmisə ti nərəhiien t̄ini. Nənə ko irəha həkpar mhə.

<sup>4</sup> Mətə piak me, kimiaha hiəpkarə mhə ia nəpitəvien rəmwhen ia nirəha. Ripkatukwatukw mhə mə nəp̄in nəha tro kimiaha hiərkərinari rəmwhen ia rakres riti.

<sup>5</sup> Kimiaha n̄ipwnəti nukuraanien me mine niranien. Ripko mhə kitaha n̄ipwnəti nəpitəvien me mine nəp̄in.

<sup>6</sup> Ro iam̄nhi pwəh səpwəh nəmwhenien ia nərmama me i kamhapri, mətə pwəh samətui a, mhəpwəh noien rəmwhen ia nərmama me i kamhənimwi nən̄imwiien skai mamhakonə irə.

<sup>7</sup> Iakani iam̄nhi irə ti nəri nə mə nərmama me i kamhapri, irəha kamhapri ia nəp̄in. Nənə

nərmama səməme kəmhənəmwi nənimwiien skai mamhakonə irə, irəha kəmo noien nəha ia nəpin.

<sup>8</sup> Mətə kitaha i nipwnəti nukuraanien me. Pwəh sətui mhəpwəh nakonəien nənimwiien skai. Pwəh səkwətəmhiri noien səvəi nahatətəien mine nokeikeiien. Noien nəha rəmwhen ia tinari kino ia aean ramo tukuahag kwənpwenhi iərmama ti naruagənien. Pwəh səmri pen əknekən nətərigien səkitaha ia Kumwesən mamheitenhi in mə truvehimiru kitaha. Noien nəha rəmwhen ia kəfəfau kino ia aean ramo tukuahag kənkəpwə iərmama ti naruagənien.

<sup>9</sup> Kumwesən ripkrfi mhə kitaha mə niemaha səvənhi truvehe tukutaha, mətə rīmərfi kitaha mə Iesu Kristo Iərimənu səkitaha truvehimiru kitaha.

<sup>10</sup> In rīmamhə tukutaha mə saməmiru uə səuvamhə raka tsəukurən narəien kitaha min.<sup>a</sup>

<sup>11</sup> Ro iamīnhi irə tihəuvehi utə nətərigien səkimiaha me, nənə mhərpwi əknekən kimiaha me rəmwhen sə hiamo ipwet mine.

### *Nəvhəgien me sampam*

<sup>12</sup> Piak me, iahaməres pehe m kimiaha mə tihəsi ai nərmama me nəha kəmhəsese kimiaha mīnraha, səməme Iərimənu səkitaha rīməuvehi utə irəha hasori ia kimiaha, nənə mamhəvhəg m kimiaha.

<sup>13</sup> Tihəsi ai amasan irəha mhokeikei irəha ti wok sə kəmo. Kimiaha tihəməkeikei mharə ia nəmərīnuien, mhəpwəh nəvisəien m kimiaha me.

<sup>14</sup> Nənə piak me iahaməni pehe tukumiaha i mə

---

**5:9:** 1Tes 1:10, 2Tes 2:14      **5:10:** Rom 14:8-9, 1Tes 4:14  
**a 5:10:** Suatuk riti mwi ti nīnien nəgkīariien i ia vas 10 in i mə: “In rīmamhə tukutaha mə samapri uə samətui tsəukurən narəien kitaha min.” **5:11:** Jut 20      **5:12:** 1Kor 16:18, 1Tim 5:17      **5:14:** 2Tes 3:6,11,15

tihaməkeikei mhəgkiari skai m nərmama səməme kamharpaha. Nərmama səməme rerinraha rəpou tihəgkiari vivi minraha mhəuvehi utə nətərigien səvənraha. Hasitu ia nərmama səməme niskaiien səvənraha riwən. Niemaha trəpwəh nəpi akwauakwien kimiaha, mətə tiho nətərigien səkimiaha rəpwəmwis ti nirəha pam.

15 Trini minuə nərmama kamho rərəha ia kimiaha, mətə tihəpwəh nərpinien tai noien səvənraha. Nəpin me pam tihaməkeikei mhousari mə tiho ramasan m kimiaha me mine nərmama me pam.

16 Rerimiaha traməkeikei mamagien ia nəpin me pam,

17 nənə, mhəgkiari m Kumwesən ia nəfwakiiien ia nəpin me pam.

18 Nəpin me pam tihəni tanak ti Kumwesən nəri auər a mə hiamarə ia namasanien uə nərəhaien. Tiho iamihni ti nəri nə mə in i nəkwai Kumwesən sə in rokeikei mə kimiaha nərmama səvəi Iesu Kristo tiho.

19 Tihəpwəh niniseien Nənimwin Ikinan.

20 Tihəpwəh nətə ərəhaien nəgkariien səvəi iərmama riti sə rini mə Kumwesən riməuvei pen nəgkariien nəha min.

21 Hətoni amasan nənə mhəkiri amasan narimnari me pam, nənə, mhəkwtəmhiri əknekən nəri amasan,

22 nənə, mhəpwəh narimnari me pam səməme hərəha.

<sup>23</sup> Pwəh Kumwesən əpa i Kumwesən səvəi nəməriniuen ro kımiaha hiəuvehe mhəmher pam. Pwəh in ro nənimwin me pam səkımiaha, mine nıpwramiaha me pam tuhatukwatukw ia nəpın İərimənu səkitaha İesu Kristo truvehe irə.

<sup>24</sup> Kumwesən rınəkwein raka kımiaha, nənə, kımiaha hiəukurən nətigateien irə mə in tro narimnari me nəha.

<sup>25</sup> Piak me, tihəfwaki tukumaha.

<sup>26</sup> Tihəni ramasan ti piəvtaha me, mhakei minraha ia nakeiien sə rəmher.

<sup>27</sup> İa nəghi İərimənu səkitaha iakani skai tukumiaha i mə tihəvsini irapw nəkukuə i m piəvtaha me pam.

<sup>28</sup> Pwəh namasanien səvəi İərimənu səkitaha İesu Kristo tramarə tukumiaha.

**Nəkukuə Ikinan**  
**The New Testament in the Nafe (Kwamera) language**  
**of Southeast Tanna, TAFEA Province, Vanuatu**  
**Niutestamen long lanwis Nafe blong Vanuatu.**  
**Le Nouveau Testament dans la langue Nafe de**  
**Vanuatu.**

copyright © 2013 Wycliffe Bible Translators, Inc.

Language: Nafe (Nafe)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-06-18

---

PDF generated using Haiola and XeLaTeX on 18 Apr 2025 from source files dated 31 Aug 2023

26b0f540-c192-5878-be67-18ede9ab1416